

Malaysia komited laksana konservasi alam sekitar di peringkat global - Tun M
AstroAwani
27 September 2019
Harits Asyraf Hasnan

NEW YORK: Malaysia kekal komited dalam melaksanakan komitmennya terhadap konservasi alam sekitar menerusi penyertaan perjanjian global mengenai pemuliharaan, hidupan liar, perhutanan dan alam sekitar.

Perdana Menteri, Tun Dr Mahathir Mohamad menegaskan formula penting kepada usaha menyeimbangi tanggungjawab manusia kepada bumi adalah menerusi Perjanjian Alam Sekitar Pelbagai Hala.

“Justeru, kita seharusnya menggunakan dan melindungi sumber alam sebaiknya dengan memulihara dan melakukan sesuatu secara lestari.

“Usaha ini harus diamalkan oleh semua peringkat manusia untuk memastikan kita terus berjaya, terutama dalam mendepani impak perubahan iklim.

“Kami percaya apabila alam dipinggirkan, penggunaan sumber alam secara tidak lestari, ia akan berkait dengan perubahan yang berlaku ketika ini,” katanya.

Beliau berkata demikian ketika menyampaikan ucapan pada program sampingan sempena Perhimpunan Agung Pertubuhan Bangsa-Bangsa Bersatu (PBB) bertajuk

"Pengawasan Persekitaran dalam Menangani Kemiskinan bagi Mencapai Pembangunan Lestari untuk Semua" di ibu pejabat badan dunia itu, di sini, pada Khamis.

Turut hadir dalam program itu ialah rakan sejawatnya dari Pakistan, Imran Khan serta Menteri Hal Ehwal Ekonomi Malaysia, Datuk Seri Mohamed Azmin Ali.

Jelas Dr Mahathir, komitmen terhadap kelestarian alam sekitar itu diterjemah Malaysia menerusi keanggotaan dalam pelbagai konvensyen dan perjanjian melibatkan pemuliharaan hutan dan sebagainya.

Antara penyertaan Malaysia termasuk Konvensyen Kepelbagaian Biologi (CBD), Konvensyen Rangka Kerja Pertubuhan Bangsa Bersatu Mengenai Perubahan Iklim (UNFCCC), Tanah Lembah Berkepentingan Antarabangsa (Ramsar) serta Konvensyen Perdagangan Antarabangsa Spesies Terancam Flora dan Fauna Liar (CITES).

“Malaysia berpandangan Perjanjian Alam Sekitar Pelbagai Hala merupakan formula penting dalam menyeimbangi tanggungjawab terhadap planet, tanggungjawab kepada penduduknya untuk memastikan hak mendapatkan makanan, pakaian dan perlindungan serta menyeimbangi hak penduduknya untuk bangkit dari kemiskinan, dan mencari kemakmuran jangka panjang, mampan dan kebersamaan untuk negara,” katanya.

Malah, jelas Dr Mahathir Malaysia juga telah meratifikasi Protokol Montreal sejak 1989 dalam menyokong usaha global mengurangkan dan menghapuskan penggunaan bahan yang menyumbang kepada penipisan lapisan ozon.

Selain itu, Malaysia juga katanya telah berjaya memenuhi perjanjian yang ditandatangani sewaktu Sidang Kemuncak Rio pada 1992, apabila hutan di Malaysia kini seluas 18.3 juta hektar, bersamaan 55.3 peratus keluasannya.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/malaysia-komited-laksana-konservasi-alam-sekitar-di-peringkat-global-tun-m-218585>